

Ina analisa generala enstagl ina revisiun

La regenza na vesa nagina raschun per ina ulteriura revisiun da la lescha da scola

■ (anr/ac) La regenza propona al parlament da refusar l'incumbensa da la deputada Angela Casanova (pld Razén). Ella vul savair nagut dad ina revisiun parziala da la lescha da scola per sbassar ils custs effectuads da la nova lescha da scola tractada dal cussegl grond l'onn 2012. Oriundamain ha la regenza grischuna preschentà al cussegl grond custs supplementars effectuads da la proposta per ina nova lescha da scola en la summa da 6,53 milliuns francs. Il mars 2012 ha il cussegl grond tractà quella nova lescha ed augmentà ils custs per la furmaziun sin 10,47 milliuns francs entras differentas decisiuns. Effectiv ha la nova lescha procurà per in augment da las expensas per il chantun e las vischnancas en la summa da 25,6 milliuns francs. Betg per plaschair da differentas deputadas e differents deputads dal cussegl grond. In grond dumber dad els ha sutscrit l'incumbensa da la deputada *Angela Casanova* (pld Razén) che ha pretendì da la regenza dad eruir detagliadamain ils motifs per l'augment dals custs da la revisiun e da preschentar entras ina revisiun parziala da la lescha propostas adattadas per reducir ils custs. Casanova ed ils sutsegnaders èn numnadamain da l'avis ch'il cussegl grond avess decidì auter divers puncts da la lescha sche deputadas e deputads fissan stads pertscharts dals effects finanziaels effectivs.

Nagina revisiun parziala nova

La regenza propona dentant al cussegl da refusar l'incumbensa Casanova. Quai scriva la regenza en la resposta gist publicada.



Giavischa ina ulteriura revisiun da la lescha da scola per mitigiar ils custs per chantun e vischnancas: La deputada Angela Casanova (pld Razén).

LQ

Discutar mesiras finanziaels en il sector da la scolaziun na vul la regenza betg entras ina ulteriura revisiun da la lescha da scola. Sche quel pass fa da basegn vul la regenza integrar quella mesira en in program general instradà cun la finamira da destgargiar il preventiv chantunal. Sco quai che la regenza scriva en sia risposta è ella da l'avis ch'ina tala analisa scuvriss tut ils chaschunaders da custs e na sulet quels custs chaschunads da l'ultima revisiun totala da la lescha da scola. En quest connex vegnessan registrads era quels factors che han chaschunà expensas supplementaras independentamain da la legislaziun vertenta, scriva la regenza. La regenza ha vinanvat explitgà sia finamira da laschar evaluar la

structura dals custs tant dal chantun sco da las vischnancas. Ina analisa che tutga tut ils champs d'incumbensas. En la risposta vers l'incumbensa Casanova menziuna la regenza ils puncts principals che hajan effectuà custs supplementars entras la revisiun totala da la lescha da scola. Ina giada l'adattaziun dals salaris minimals, la reducziun dal pensum cumplain per tut las persunas d'instrucziun per ina lecziun per emna, l'introducziun dad ulteriuras structures dal di e l'introducziun dad uras da bloc. Vinavant la reducziun da las grondezzas maximalas da las partiziuns sco er l'augment da la dotaziun minimala da lecziun purschida en scolina sin 20 uras per emna.